



Inatsisartut

Aningaasaqarnermut Akileraartarnermullu Ataatsimi-
ititaliaq
Finans- og Skatteudvalget

Ulloq/Dato: 24. juli 2012
J.nr.: 01.31.06/12-00584

Aningaasaqarnermut Naalakkersuisoq

Tallimangornermi 20. juli 2012 Aningaasaqarnermut Akileraartarnermullu Ataatsimiititaliap aalajangernera pillugu Naalakkersuisunut ilisimatitsissut – Suliaq nr. 01.31.06/12-00584

Kalaallit Nunaata iluani ilaasunik, allakkanik nassiussanillu angallassinermut kiffartuunneqarnissamik isumaqatigiissutit nutaat.

Naalakkersuisut **inassutigaat**,

- Kontup pingaarnep 73.01.08-p ataani Kalaallit Nunaata iluani ilaasunik, allakkanik nassiussanillu angallassineq pillugu sullissisut ilanngussaq 2-mi taaneqartut isumaqatigiissu-siorfiginissaannut Naalakkersuisut Ineqarnermut, Attaveqarnermut Angallannermullu Naalak-kersuisoq piginnaatissagaat. Isumaqatigiissutinut akigititassat sivilissuserititassallu ilanngus-saq 2-mi takussutissiami allassimasutut ilusilerneqassapput.

Aningaasaqarnermut Ataatsimiititaliap oqaaseqaatai

Suliassami matumani angallannermut tunngasuni kiffartuunneqarnissamik nutaanik isumaqa-tigiissuteqarnissamut Aningaasaqarnermut Ataatsimiititaliamit ilalernerneqarnissartik Naalakker-suisut qinnutigaat. Kiffartuunneqarnissamik isumaqatigiissutit atuuttut ulloq 31. december 2012 atorunnaartussaapput.

Qinnuteqaateqartoqarpoq 2012-imut Aningaasanut inatsimmi kontumut pingaarnermut 73.01.08-mut oqaasertaliussaq tunngavigalugu. Oqaasertaliussaq ima oqaasertaqarpoq:

”Konto pingaarnep 73.01.08 Ilaasunik angallassinermut tapiissutit

Naalakkersuisut, Aningaasaqarnermut Ataatsimiititaliap akuersineratigut, konto pi-ngaarnermi matumani siunertarineqartut iluanni suliassamik aaqqiinissamut suleqa-tissanik avataaneersunik isumaqatigiissuteqarnissamik piginnaatinneqarput. Isuma-qatigiissutini 1.202 mio. kr.-nit qaangerneqassanngillat piffissamilu 2012-2022-mut atorneqaqqusaallutik.

Konto pingaarnep 73.01.08 Ilaasunik angallassinermut tapiissutit-mut nassuiatit

Tamanut timmisartumik angallassinerup umiarsuarmillu angallassinerup ingerlannis-saannut isumaqatigiissuteqarnikkut sipaarniuteqarnikkut ukiuni arlalinni atuuttussa-mik isumaqatigiissuteqarnissamut Naalakkersuisut tunngavissaqalernissaat oqaaser-taliussatigut qulakkeerneqarpoq.

Oqaasertaliussat AI 2011-miit iluarsineqarlutik ingerlateqqitaapput.”

Tamanna tunngavigalugu angallannikkut suliassat isumagineqarnissaannut neqerooruteqartit-sisoqarsimavoq. Qinnuteqaat nassiunneqartoq Aningaasanut inatsimmi piginnaatitsissutip imarisamigut aningaasatigullu killiliussaasa angallassisartullu neqerooruteqarnermini tun-gavigisimasaasa iluaniippoq.

Ataatsimiititaliap ilisimaaraa neqeroorutit attatiinneqarneqarnissaannut piffissarititaasoq ulloq 1. august 2012-imut killeqartoq, tamatumali isiginiarneqannginnissaa toqqarlugu, naak tamanna nutaamik neqerooruteqartitsisoqassappat tamatumunnga atatillugu angallassisartut neqeroorutaannik akisunerulersitsisinnaagaluartoq.

Ataatsimiititaliap suliap suliarineqarneranut atatillugu Ineqarnermut, Attaveqarnermut Angallannermullu Naalakkersuisumik apersuisimavoq.

Ataatsimiititaliap matumani makkuninnga apeqquteqarlunilu kissaateqarniarpoq:

Ilaanakortumik akuersissuteqarsinnaanermut itigartitsisinnaanermullu periarfissat

1. Qinnuteqaammut ilanngussaq 2 naapertorlugu angallannermi suliassat saqqummiunneqartut ilaasa kisimik akuerineqarsinnaaneranunt periarfissat sukumiinerusumik allaaserineqarnissaat ataatsimiititaliap kissaatigaa. Ataatsimiititaliap maluginiarpaa Disko Line-ip neqeroorutaani saqqummiunneqartumi nunatta Kujataa Qeqertarsuullu Tunua ataatsimut pineqartut. Ataatsimiititaliap isumaqarpoq tamanna isummernissamut tunngavissiamut piareersarluagaanngitsumut ersiutaasoq, isumaqarlunilu tamanna **sakkortuumik isorineqartariaqartoq**. Neqeroorutit assigiinngitsut akornanni arlaattigut suliassat ingerlanneqarnissaat isumaqatigiissutissatigullu pituttuisunik allanik ataqatigiittoqarpa?
2. Teknikikkut, ulluinnarni ingerlatsinissaq eqqarsaatigalugu aningaasatigullu periarfissaqarpa assersuutigalugu kiffartuunneqarnissamik isumaqatigiissutit atuuttut tamarmik ilaannaasaluunniit ukiumik ataatsimik sivitsornissaannut, soorlu tamanna siusinnerusukut 2010-mi atorneqarsimasoq, taamanikkut isumaqatigiissutit ukiunik marlunik sivitsorneqarmata Angallanneq pillugu isumalioqatigiissitap sulinerata naammassineqaqqaarnissaa kissaatigineqarmat (Aningaasaqarnermut Ataatsimiititaliap suliaa 10-501)?
3. Ataatsimiititaliap Naalakkersuisut ataatsimut inassuteqaataannik itigartitsissagaluarpat tamanna aningaasatigut ulluinnarnilu suliassat eqqarsaatigalugit sunik kinguneqassava?
4. Ataatsimiititaliap aalajangerpat assersuutigalugu ulloq 15. november 2012 missaanni 2013-imut Aningaasanut inatsimmi angallannermut tunngasunut aningaasaliissutinik nalinginnaasumik qaffaanermut atatillugu aatsaat angallanneq eqqarsaatigalugu isumaqatigiissutit akueriniarlugit, tamanna sunik kinguneqarsinnaava? (Ataatsimiititaliap ilisimaaraa Nunatta Karsiata akiliisinnaassuseqarnera ukiuni makkunani tatisimaneqartoq, ilaatigut inuiaqatigiit ukioqassutsikkut katitigaanerata allanngoriartornera pisutigalugu siunissami ukiumut 1 milliard kr. tikillugit aningaasartuuteqarnerusalernissaq naatsorsuutigineqartariaqarluni, taamaattumillu suliassaqaarfimmi matumani aningaasaliissutinik qaffaasoqassappat tamanna angujuminaassalluni suliassaqaarfinni allani taamaaqataanik sipaaruteqartoqanngippat).
5. Angallannermi suliassat ilanngussami 2-mi taaneqartut skemanngorlugit takussutissiarineqarnissaat kissaatigineqarpoq, nalunaarlugu Naalakkersuisut suliassat ataasiakkaat tamaasa eqqarsaatigalugit angallannikkut isumagineqarneq ullumikkut pissutsinut sannilliullugu *pitsanngoriartussat*, *ajorseriartussat* imaluunniit *allannguteqassanngitsut* nalilernerat.

Kujataani angallannermi suliassat

6. Ataatsimiititaliap ilisimaaraa Air Greenlandip qangali nalunaarutigereeraa ingerlatseqatigiiffiup qulimiguuliutai S-61-it marluk 2012/13-imi ukiut nikininneranni ilaasunik assartuinnermut atorneqarunnaassasut. Ataatsimiititaliamili isumaliutigineqarpoq ullu-

mikkut atugassarititaasut naapertorlugit nunatta Kujataani S-61-it atorneqaannarsinnaanissaat, tassunga ilanngullugu minnerunngitsumillu ujaasisarnernut annaassiniartarnernullu upalungaarsimanermut atatillugu. Ataatsimiititaliap taamaattumik Naalakkersuisut qinnuigaat pisortatigoortumik Air Greenlandimut attaveqaaqqullugit atorunnaarsitsiartuaarnerup ingerlasup taamaatiinnarneqarnissaanut kinguartinneqarsinnaanerannulluunniit periarfissat oqallisigineqarnissaat siunertaralugu. Ataatsimiititaliap kissaatigaa makku pillugit aalajangersimalluinnartunik paasissutissinneqarnissani kissaatigaa, 1) ataatsimiititaliap kissaataa qanoq piviusunngortinneqarsinnaanersoq, aamma 2) tamanna ukiumut qanoq akeqassanersoq, aamma 3) tamanna qanoq aningaasalersorneqarsinnaanersoq, ass. suliassaqarfinni allani aningaasaliissutit annikillisinnerisigut, kiisalu 4) S-61-it, kingoraartissianik pissarsisoqarsinnaappat malittarisassallu atuuttut malillugit aserfallatsaalineqarsinnaappata, atorneqarnerisa sivitsorneqarnerat sillimaniarneq eqqarsaatigalugu aporfissaqarnerasoq.

7. Nunatta Kujataani ilaasunik angallassineq eqqarsaatigalugu kiffartuunneqarnissamik isumaqatigiissutip ass. ukiumik ataatsimik sivitsorneqarsinnaanernut teknikikkut alatiqullu periarfissaqarpa, tamaani angallannikkut suliassaq eqqarsaatigalugu nutaamik neqerooruteqartitsinissaq siunertaralugu qulimiguulimmillu allamik nutaamik S-61-ip taartissaanik ass. EC225 Super Pumamik atugaqalernissaq tunngavigalugu?
8. Ataatsimiititaliap kissaatigaa nunatta Kujataani angallannikkut aaqqiissutissatut matumani siunnersuutigineqartoq eqqarsaatigalugu suliffeqarfinnik annaasaqarnissaq pilersitsinissarlunneq innerusumik sukumiinnerusumik ataatsimut nalilersueqqissaartoqarnissaa. Ataatsimiititaliap ilaatigut paasissutissinneqarsimavoq S-61 atorunnaassagaluarpat Air Greenlandimiit inuit 30-70 soraarsinneqarumaartut. Tamatumani ilaatigut pineqarput timmisartortartut, saqisut, mittarfinni sulisut minnerunngitsumillu teknikikkut sulisut, immikkut ilisimasaminnik qulimiguulinni allani angallannerulluunniit allannortinneqarnerata malitsigisaanik suliffissani allani pilersinneqartuni atuisinnaajunnaartussat.
9. Siuliani apeqqummut nangissutitut kissaatigineqarpoq paasissutissiissutigineqassasoq suliassamik isumaginnittussatut siunnersuutigineqartoq qularnaatsumik Air Greenlandimit soraarsitaasussat ilaannik/amerlanernik tiguisinnaassanersoq?
10. Naalakkersuisunut ilaasortamit oqaatigineqarpoq angallannikkut aaqqiissutissatut siunnersuutigineqartukkut ataatsimut isigalugu nunatta Kujataani ilaasoqarsinnaassuseq annertunerulissasoq. Tamanna ilumoorpoq qulimiguulinni umiarsuarnilu inissat katillugit qiviaraanni. Ataatsimiititaliarli isumaqarpoq taakku naammannersut qularnartoq. Taamaalilluni sikorsuit nalaanni taamaallaat qulimiguulinnik pisariaqartitsisoqartartussaangilaq, kisiannili aamma piffissani ukiukkut kangerluit sikusimatillugit taamatut qularnannigitsumik aamma pisariaqartitsisoqartartussaalluni. Assertuutigalugu ukioq manna Tunulliarfik qamutinit assakaasulinnit angallavigneqarsinnaasumik ukiukkut sikoqarsimavoq. Taamatuttaaq ukiukkut sikuunerani sikorsuaqarneranilu naatsorsuutigineqartariaqarpoq qulimiguullit ulikkaaqquartarnissaat, taamaalilluni annilaa-ngatigineqarsinnaalluni taamani angallassisinnaassuseq ilumut naammassanersoq. Tamanna tunngavigalugu kissaatigineqarpoq ataatsimut nalilersorneqassasoq nunatta Kujataani angallannikkut suliassaq qanoq naammassiniarneqartassanersoq ukiup qanoq innerinut assigiinngitsunut agguataarlugu (soorlu ass. aasakkut/sikorsuaqarnerani/ukiukkut sikuunerani il.il.).
11. Nunatta Kujataani angallannikkut ingerlassisoqarpa tamanik angallannikkut suliassami isumaginnikkumasinnaasunik?
12. Ataatsimiititaliamut ilaasortat arlallit isumaqarput angallannikkut aaqqiissutissatut siunnersuutigineqartoq isumannaallisaaneq eqqarsaatigalugu naammaginangilluinnartoq. Tamatumunnga pissutaatinneqarpoq qulimiguullit mikinnerusut nutaat eqqar-

saatigalugit taakkununga isumannaallisaanikkut piumasaaqatit annikinnerummata taamatullu aamma ujaasinissamut annaassiniarnissamullu upalungaarsimanermut SAR-imut atorneqarsinnaanngimmata. Naalakkersuisut isumaqarpat taamatut ernum-mateqarnejq pissutsit eqqarsaatigalugit tunngavissaqartoq?

Kommunik suliniaqatigiiffinnillu peqataatsineq

13. Ataatsimiititaliaq isumaqarpoq suliami aalajangiisoqartinnagu najukkani ataasiakkaani susasaqartut amerlanerusut akuliutsinneqarnissaat pisariaqartoq. Ataatsimiititaliap taamaattumik Naalakkersuisut qinnuigaat angallannikkut aaqqissutissatut siunner-suutitut saqqummiunneqartunut kommunalbestyrelsinit sisamanit tamanit oqaase-qaammik pissarsiniaqullugit. Tamanna pisariaqarpoq atortussat paasissutissallu Aningaasaqarnermut Ataatsimiititaliamut tunniunneqartut assingisa kommuninut nassiunneqarnerisigut, pisariaqarpat paasissutissat suliffeqarfiit akunnerminni unammilleqatigiinnerannut sunniuteqarsinnaasut titarlugit ilisarsaajunnarsillugit. Tamatumani akisutisarineqartut Aningaasaqarnermut Ataatsimiititaliamut nassiuteqquneqarput pisariaqarpat Naalakkersuisunit oqaaseqaatitalerlugit. Pissutsit eqqarsaatigalugit tusarniaa-nermi piffissarititaasartut eqqarsaatigalugit kommuninut nalinginnaasumik piumasaaqaataasartut isiginiarneqarsinnaanatillu isiginiarneqannginnissaat suliami matumani pisariaqarpoq.
14. Ataatsimiititaliap taamatuttaaq kissaatigaa minnerunngitsumik nunatta Kujataa eqqarsaatigalugu Visit Greenland A/S-imiit takornariaqarnermut sunniutaasinnaasut eqqarsaatigalugit, taamatuttaaq Sulisitsisut Peqatigiiffianit inuussutissarsiornermut sunniutaasinnaasut eqqarsaatigalugit naliliinernik pissarsiniartoqassasoq.

Pissutsit allat

15. Nunarput ataatsimut isigalugu assartuisarnerup aaqqissuussaanera eqqarsaatigalugu angallanneq eqqarsaatigalugu isumaqatigiissutissatut missingiutit piffissaq ungasinnerusoq eqqarsaatigalugu sunniutigisinnaasaasa nalilerneqarnissaat kissaatigineqarpoq. Tamatumunnga atatillugu kissaatigineqarpoq ilisimatitsissutigineqassasoq angallanneq eqqarsaatigalugu isumaqatigiissutissat matumani pineqartut taamatut isikkoqartillutik aningaasaqarniarnikkut ingerlatsinerup pitsaanerusumik attanneqarsinnaaneranut siuarsaataasinnaanersut?
16. Angallanneq pillugu isumalioqatigiissitap sulisimanera kiffartuunneqarnissamik isumaqatigiissutissatut missingiutitut saqqummiunneqartunut arlaatigut sunniuteqarsimava?
17. Ataatsimiititaliap isummernissaanut pingaaruteqarsinnaasunik allanik Naalakkersuisut ilisimatitsissuteqarsinnaappat?

Aningaasaqarnermut Ataatsimiititaliap aalajangenera

Qulaani allassimasutut paasinnilluni inassuteqaammut isummernissani Aningaasaqarnermut Ataatsimiititaliap **kinguartippaa**.

Qulaani apeqqutitut Naalakkersuisut akissutaat piffissaq siulleq atorlugu kalaallisut qallunaa-tullu nassiuteqquneqarput qarasaasiakkut assilinera nch@ina.gl-imut ilanngullugu.

Aningaasaqarnermut Ataatsimiititaliaq sinnerlugu

Olga P. Berthelsen
Siulittaasup tullia